



Dalabyggð
Miðbraut 11
370 Búðardalur

UMHVERFIS- OG
AUÐLINDARÁÐUNEYTIÐ

Skuggasundi 1 101 Reykjavík
sími: 545 8600 postur@uar.is
umhverfisraduneyti.is

Reykjavík 22. september 2020
Tilv.: UMH20040040/8.11

Ráðuneytinu barst meðfylgjandi erindi frá Mosfellsbæ, dags. 3. apríl sl., varðandi mögulegar breytingar á heilbrigðiseftirlitssvæðum. Í erindinu er þess farið á leit að ráðuneytið kanni möguleikann á því að Heilbrigðiseftirlitssvæði Kjósarsvæðis verði lagt niður í núverandi mynd og að heilbrigðiseftirlit Mosfellsbæjar sameinist eftirlitssvæði Hafnarfjarðar- og Kópavogssvæðis. Sambærilegt erindi barst frá Seltjarnarnessbæ, dags. 5. maí sl., með ósk um að heilbrigðiseftirlit fyrir Seltjarnarnessbæ sameinist eftirlitssvæði Hafnarfjarðar- og Kópavogssvæðis eða að gerðar verði aðrar breytingar þannig að Seltjarnarnessbær verði ekki lengur hluti af Kjósarsvæði. Erindið er meðfylgjandi.

Samkvæmt 44. gr. laga nr. 7/1998 um hollustuhætti og mengunarvarnir skal ekkert sveitarfélag vera án heilbrigðiseftirlits. Landinu er skv. 1. mgr. 45. gr. laganna skipt í eftirlitssvæði og skal heilbrigðisnefnd, kosin eftir hverjar sveitarstjórnkosningar, starfa á hverju svæði. Ráðherra getur skv. 3. mgr. 45. gr. að höfðu samráði við hlutaðeigandi sveitarfélög og að fenginni umsögn Umhverfisstofnunar kveðið á um sameiningu eftirlitssvæða í reglugerð. Samkvæmt 10. tölul. 2. mgr. 45. gr. laga nr. 7/1998 er starfssvæði Kjósarsvæðis Seltjarnarnessbær, Mosfellsbær og Kjósarhreppur.

Ráðuneytið óskaði eftir umsögn Heilbrigðisnefndar Kjósarsvæðis um framangreind erindi Mosfellsbæjar og Seltjarnarnessbæjar og barst meðfylgjandi umsögn nefndarinnar með bréfi dags. 20. maí sl. Ráðuneytið óskaði jafnframt eftir umsögn Umhverfisstofnunar um erindin og barst umsögn stofnunarinnar með bréfi dags. 22. maí sl. Ráðuneytið upplýsti Samband íslenskra sveitarfélaga um málið með tölvupósti hinn 8. maí sl. og óskaði jafnframt eftir afstöðu Kjósarhrepps sem bókaði á fundi hreppsnefndar 14. maí sl. að hreppsnefndin tæki ekki afstöðu til málsins.

Í framangreindri umsögn Umhverfisstofnun kemur fram að stofnunin veiti umsögn sína á grundvelli mats á skyldum heilbrigðiseftirlitsnefnda samkvæmt lögum. Fari ráðherra þá leið að verða við beiðni umræddra sveitarfélaga og sameina heilbrigðiseftirlit Seltjarnarnessbæjar og Mosfellsbæjar að eftirlitssvæði Hafnarfjarðar- og Kópavogssvæðis, stæði sveitarfélagið Kjósarhreppur, að óbreyttu, eitt að Heilbrigðiseftirlitssvæði Kjósarsvæðis. Þrátt fyrir að lög standi ekki í vegi fyrir slíku fyrirkomulagi bendi stofnunin á að slík skipan væri að mati stofnunarinnar ekki vel til þess fallin að standa undir þeim skyldum sem hvíla á heilbrigðisnefndum enda er sveitarfélagið fámenn og hefði hag að samvinnu við önnur sveitarfélög við heilbrigðiseftirlit. Skipan heilbrigðisnefnda tók á sínum

tíma mið af kjördæmaskipan sem nú er breytt. Ef því viðmiði væri fylgt með hliðsjón af þeim sjónarmiðum sem höfð var hliðsjón af við setningu laga um hollustuhætti og mengunarvarnir væri rétt að Kjósahreppur sameinaðist einnig eftirlitssvæði Hafnarfjarðar- og Kópavogssvæði. Ef ekki er grundvöllur fyrir því leggi Umhverfisstofnun til að heilbrigðieftirlit Kjósasvæðis yrði sameinuð Heilbrigðisnefnd Vesturlands. Umhverfisstofnun bendi á að þrátt fyrir að hér að framan sé vísað til skiptingar heilbrigðiseftirlitssvæða með hliðsjón af kjördæmaskipan myndi það þjóna verkefnum í mengunarvörnum best ef starfssvæði heilbrigðisnefnda væri ávallt landfræðilega samfelld en því er ekki að heilsa með suðvesturkjördæmi.

Hér með er óskað eftir afstöðu sveitarfélagsins um þann möguleika að Kjósarhreppi yrði bætt við starfssvæði heilbrigðiseftirlitssvæðis Vesturlands. Í framhaldi af afstöðu sveitarfélagsins stefnir ráðuneytið á að funda með fulltrúum sveitarfélaga á Vesturlandi til að fara yfir málið.

Óskað er eftir því að afstaða sveitarfélagsins berist eigi síðar en 6. október nk.

Fyrir hönd ráðherra

Sigurbjörg Sæmundsdóttir

Agnar Bragi Bragason

Afrit:
Samband íslenskra_sveitarfélaga
Heilbrigðisnefnd_Vesturlands
Samtök_sveitarfélaga_á_Vesturlandi

Samrit af þessu bréfi fá önnur sveitarfélög á Vesturlandi.